

Iluni kikkunnit tamanit iserfigineqarsinnaasuni imaluunniit amerlasuunik sulisoqarfiutigisuni pisortat sanaartortitsinerini iluarsaassinikkullu suliaqarnerini (pisortat sanaartortitaat) sanaartornissamut aningaasaliissutit tamakkerlutik 1 %-iinik sanaartukkap silataatigut iluatigullu kusassarneqarnissaannut atugassanik Naalakkersuisut immikkoortitsisaqqullugit peqquneqarnissaannik Inatsisartut aalajangiinissaannik siunnersuut. Aningaasat taakku ingerlatassamut immikkut normulerneqartassapput ukiumoortumillu Aningaasanut inatsisissatut siunnersuummi takuneqarsinnaassallutik.

(Inatsisartuni ilaasortaq Jane Petersen, Inuit Ataqatigiit)

Akissuteqaat

(Ineqarnermut, Attaveqarnermut Angallannermullu Naalakkersuisoq)

Aappassanneernejarnera

Aallarniutigalugu oqaatigissavara, ataatsimiititaliap nammineerluni naliliinermini "eqqumiitsulianut" nassuiaat pillugu isummersuutaanut Naalakkersuisut tamakkiisumik tapersiimmata.

Kulturip tangia kalaallit kulturiannik ingerlatitseqqinnertut paasisassaasoq, taamaattumillu oqaluttuarisaanermut, ullutsinnut siunissamulluunniit tunngasinnaasoq pillugu ataatsimiititaliaq oqarmat Naalakkersuisut isumaqataapput.

Kulturerput nalinginnaasumik, pingaartumillu illorsualiani saqqummersissallugu inissaqartinneqanngitsuuppat Kalaallit Nunaat pitsuusimassagaluarpoq. Taakkunannga Aka Høeghip Qaqortumi GU-mi iikkani qalipagai kusanartorsuit, kulturip illorsuata Katuap kiisalu naluttarfiup Maliup ilusiligaanerat, Nuummi kommunip allaffiani Hans Lyngep qalipagaanit tippiliat iikkani nivingasut, Sisimiuni Taseraliup ilusiligaanera, Upernavimmi Illu Sammisassaqaqtitsivik kiisalu Tasiilami oqaluffiup ilusiligaanera eqqaaginnariarlakka.

Siunnersuut taamaallaat illulianut 25 mio. koruunit sinnerlugit naleqartunut atuutsinneqassasoq, aammalu inissialiat, taakkununngalu ilanngullugit ilinniartut inaat siunnersuummi pineqartunut ilaanningsut Naalakkersuisut ataatsimiititaliaq isumaqatigaat.